

■ OR DA LA VITA DA LUDMILLA CAHENZLI

# Vegns cun mai tar la dentista?

«Mamma, jau stoss ir tar la dentista. Vegns era cun mai?»

«Vai anc!», di mia mamma da tschel maun da la lingia da telefon. «Ti has quaranta onns. Ti es veglia avunda per ir suletta tar il dentist.»

Dad x-insanua enconusch jau questa frasa. Avev'jau forsa ditg il medem avant dus mais, cura che mia figlia aveva stuì ir tar la dentista e m'aveva dumandà, sch'jau l'accumpogna?

Diavelen. Jau sun ina mamma uschè brutala che fatsch ir mia paupra figlia tut suletta tar la dentista. Ed ussa fa mia mamma exact il medem cun mai. Ma jau na dun anc betg si il spiert.

«Mamma! Fa il bain e ve! Jau stoss laschar far in tractament da la ragisch. L'ultima giada ha quai fatg dolurs.» Jau sgnuffl.

«Sche bun», di mia mamma. «Jau t'accumpogn. Cura has dad ir?»

«En in'ura.»

«Ma jau dovr minimum duas uras, fin ch'jau sun tar tai», di mia mamma.

«Gea, quai è vair. Lura spost jau il termin», di jau.

«Ludmilla! Ussa na fa betg teaters e va tar il dentist. En duas uras è tut passà.»

«Ma i fa mal ed jau hai tema.»

«Taidla, Ludmilla, jau envid ina chandaila per tai e ditg intgins paternoss, lura va quai schon.»

«Mhm», di jau.

«Has chapì!», di la mamma. «Jau pens a tai!»

«Mhm», di jau.

«Na stos betg temair, ti stos ta fidar da Dieu.»

Suenter blers «mhm's» ed in fermezza coaching religius terminain nus noss dis-

curs al telefon. Jau accept mia sort. Ed il pli impurtant, jau engir da mai pli trametter in da mes uffants tut sulet tar in dentist. En ina tala ura na dastga ina mamma mai e pli mai bandunar ses uffant!

PS: I n'è per cas betg stà uschè nausch. Mia mamma ha atgnamain raschun ch'ins na duess betg tadlar sin tut ils puplms e planschims.

Ins na dovra betg trasora pupragnar ils uffants. Quels pon bain ir sezs tar il dentist.

**Il cudesch pon ins retrair online tar Lia Rumantscha [www.liarumantscha.ch](http://www.liarumantscha.ch) ([http://www.liarumantscha.ch/sites/content/online\\_shop.html?shop:view=details&shop:productid=2830](http://www.liarumantscha.ch/sites/content/online_shop.html?shop:view=details&shop:productid=2830)) u tar mintga libreria**

